

Quellenwerk zur Entstehung der Schweizerischen Eidgenossenschaft, 9.Nr. 1

In nomine domini. Notum sit omnibus nobilibus et ignobilibus tam futuris quam presentibus, qualiter ego Wichardus et frater meus Ruopertus, dux militum regis Luodewici, qui nobis ex consanguini(ta)te coniunctus est, omnia predia nostra, quae nobis ex paterna hereditate advenerunt, ex illius permissione et iuvamine dividimus. Postea frater meus pro amore dei et remedio anime suae ductus omnem partem suam, quae ad eum pertinebat, domino suo regi contradidit, ea videlicet ratione, ut in castro Turicino iuxta fluvium Lindemaci ecclesiam construeret et servitium dei ibidem perpetualiter constitueret. Unde ego Wichardus presbyter quamvis indignus ex intimo desiderio compunctus in quodam loco, qui Lucerna ex antiquitate est dictus, iuxta fluvium, qui Rusa vocatur, qui de sumitate magni laci fluit, in honore sancti Mauricii et sociorum eius et sancti Leodegarii martyris et omnium sanctorum parvum tugurium construxi, omnem substantiam, quae me contingit de monte, qui A1bis vocatur, incipiens a predio meo Lunchunft et omnibus locis circumquaque iacentibus, ex permissione regis, cognati mei, ad ipsum locum contradidi et me ipsum illic propter servitium collocavi et tantos monachos, quantos potui, illic congregavi. Unde vir quidam nobilis ac bonus ad me veniens, qui spretis omnibus curis huius seculi, quem ego ipse monachum illic ordinavi, nomine A1wicus, ita ut pene dicam per omnia dei amicus, prudens in scripturis sanctis, qui suis admonitionibus ac verbis salutaribus corda omnium civium regionis illius in dei provocavit affectum. Inde de die in diem crescente servicio dei ipsum Alwicum mei successorem ac rectorem ipso loco dereliqui. Acta sunt haec temporibus Ludewici regis anno ab incarnatione domini iii. indictione xiii.